

**950.***ohne Datierung****Nickel Dietrich aus Gera quittiert den Erhalt von Gut und Geld.***

*fol. 175v* Nickel Dittrich von Gera hat bekanth, das òm Kunrad Gessener czu gutem dangke widir uszgericht und bezalt, daz er bei òn czu getruwir hant eyngelait hat.

**951.***1450 Februar 13****Vergleich unter den Erben von Wenzel Seiler.***

*fol. 176r* Wiszit daz vor uns komen sint Caspar von Gera zu Peszenig gesessen als der neste swertmage Wenczil Seyler<sup>a)</sup> seylogin seyns bruders gelaszen funff kindir uff eyne, Paul Neffe mit frauwen Elizabeth, synir eewirtin, uff dy andere seyten, der kindir mutir, und haben uns bericht, wy sy mit eynandir in irthum sint von wegen der teilunge huszis, hoffes, egkir und allir farindir habe in Wenczil Seylers seligin munde verstorben, nichtis nicht uszgesloschen und uns flislichen gebeten, sy dorusz czu entscheiden haben wir uns umbe ir beidir bethe willen gemuhit und sy mit ir allir bewust usz allir gelasziner hab, farindir und unfarindir, geteilt und geschiden, als hirnach geschr(ieben) stehit. Also daz sich Paul Neffe mit frauwen Elszin, synir eewirtin, der gelaszen gutir, husz, hoff, egkir und aller farinde habe undirczihen, dernach synen besten gebrauch in und den funff kindern vor ire gebure reichin und geben sal dreyhundirt und achczig alde schogk aldir meisner <sup>a)</sup>funff heller<sup>a)</sup> groschen addir so vil muncze noch werdeschaft den kindern sulche schuld iczlichem synen teil uszrichten, so sy czu mundigen jaren komen und sich vorelichin addir vorandern werden und dy kindir bynnen des mit essen, tringken und tegelichin cleidern vorphlegen und vorsorgen, irem vetirlichem erbgelde ane schaden. Auch ist von uns uszgesagit, ab sich der kindir eyns addir mehir vorelichen wurden, waz on denne ire muter addir ir vormunde czu herlichkeit der hochzeit an cleidern, gespenge addir andir zirunge kauffen und schigken wurden, daz sal den selbin kinde an synir gebure abgelagen werden, und alle schulde, dy Wenczil Seyler uff daz rathusz an hauptgelde czinszen und geschoschen und andirs wo schuldig gewest ist, sint abgelagen und in dy obgeschr(iebene) schuld nicht gerechint nach geczogen. Auch ist man der frauwen und den kindern schuldig vier nuwe schogk 15 gr und 12 heller nach uszweiszunge der schuldczedil dorubir. Dy selbe schuld sal dy frauwe addir ir vormunde von tage czu tage eynvordirn und den kindern umbe dy czwey teil sy anlanginde rechnunge und umbe dy eyn gemante schuld uszrichtunge thun. Und ab sich bynnen des dy muncze vorandern wurde, ehir dy frauwe addir ir vormunde den kindern ir erbgelt bezalte, so sal den kindern bezalung